

Verslaag Ald Boys Jaorvergadering/ Mósselaovend, zaoterdaag 15 december 2018

Aanwezig: 34 Ald Boys leeje
Aafmeldinge ontvange van: Thijs Joosten, Jack Noldus, Hans Theuws, Peter Delsing,
Sjraar Seelen, Ward van de Dungen, Sjaak Joosten,
Sjaak van Elswijk, Ruud de Clerck.

1. Welkom

Namens ut voltallige besteur hit de veurzitter, d'n hièr Loek lèwals, idderein van herte welkom. Speciaal woord van welkom aan d'n hièr Dré Bentlage, op de kop aaf 87 jaor en beej de ièrste vergadering van dit jaor, in jannewari, nog 86 jaor. Achter de bar steit vandaag Will Huùs en vanaaf 20.00 oor zien leeftallige assistente ut-oeijts-priès-van-verdeenste-maedje Yvonne Göbbels. In de keuke staon Arno Beckers en Toine Toten zich in ut zweet te werke. Penningmeister van d'n daag is Jan van Tulder en sikkertaris/ notuleur is Paul Derkx. Auk Gé van Telfort wuurt speciaal welkom geheite en, bescheide as hae is, hit de veurzitter zichzelf as letste van herte welkom.

Nemus meldt zich veur de róndvraag (noot van de notulant: d'r heers un echte ings-cultuur ónder de aanwezige)

2. Verslaag van zaoterdaag 27 jannewari 2018, oftewaal: Jaorvergadering EIN

D'r zien gen op- of aanmerkinge op ut verslaag det alzoeë wuurt vastgesteld, ónder dankzegging aan d'n interim-sikkertaris Mark de Klerk

3. Hoèshaldelikke meideilinge/ finansjele verantwoording/ beleid veur de kómmende jaore

(Oèt praktische euverwaeginge waere dees dreej punte op einen haup gevaeg)

- a. We kinne vandaag ut glaas hõffe op os zelf. Beej dees twieëde jaorvergadering van 2018 zien gen meldinge van minse die ós hebbe verlaote. Waal van minse die d'r vandaag neet zien, maar det kump beej de ingezónde stökke.
- b. We hebben as Ald Boys eine jubilaris: d'n hièr Carel Vercoulen is 60 jaor lid!
- c. Vaerder gaon René Opheij en Hans Steinhage veur d'n twieëde kièr de veurjaorsaktiviteit organisere en waal op zaoterdaag **6 juli 2019** (nao intern crisis-euverleg is dit de nije, vastgestelden datum!!!). Nemus van de aanwezige is d'r op taege det dit gerenommeerde duo dees aktiviteit opniej veur eur raekening neemp.

Euren ièrste kièr waas op zaoterdaag 7 juli van dit jaor. Aldemanne-vereiniging ut Zootje, kaartklup Scheld Maar Raak en inkele Ald Boys hebbe dit veur Europa unieke evenement meuge meimake. René en Hans hadde werkelijk koste noch meujte gespaard um d'r eine onvergaetelikken daag van te make. D'r zoote nog wat eurie in de kas, maar die zoel beej die twieë linkmichels die handele in verzekeringe, hypotheke en pieke, ièrder oètgegaeve as binnegekómme zien, dus die twieë hebbe maar un paar pieke gehad.

- d. De Naojaorsaktiviteit van 2019 zit nog in wieje zek.

e. Finansjele verantwoording: un beejdrage van de vereniging in Gerstenaat en andere drenkskes um te zörge det weej allemaol neet tevuuel ploeeje in ut mörf kriège.

- Oèt eige tes, loeën, AOW en gespaarde of gejatte pieke: 34 x €25,- = ongeveer 800 eurie (?)
- Inkele joete van de veurigge Ald Boys aktiviteit
- As ge vanaovend neet te vuuël kloék, dan kint ge veur €25,- geknip, gewasse en geschaore waere. Dao leet dus de oètdaging veur vandaag!

f. Besteursperikele: vergaderinge van ut aafgelaupe jaor, finansjele verantwoording heej van. Ut (haos) aafgelaupe jaor hoofde d'r neet vergaderd te waere. Det haet dus auk niks gekos en det is beej de reserves veur ut kómmende jaor gevoog (noot van de notulant: kint ge dit nog volge?).

Det mak det de Ald Boys nog altièd zwarte cijfers schrief, iets waat ut haufbesteur dit jaor haet euvergenaome.

4. Verslaag van ut Veurjaors- en ut Naojaorsoëtstepke 2018

Ut Veurjaorsoëtstepke is heejbaove al oètgebreid beschreve. Ut Naojaorsoëtstepke is dit jaor neet daorgegaon. De kemmissie die dit zoel organisere, haet allerièrs ein kommunikatieplan opgesteld um ut kómmend jaor ten oètveur te bringe.

Jaorvergadering twieë van dit jaor: det verslaag ziet ge now aan ut laeze.

5. Ingekómme stökke

- Gèn verzeuke veur lidmaatschappe oèt de USA dit jaor. De veurzitter haet ein oriënterend bezeug gebrach aan de Joenaitid Steets en gekonstateerd det we veurluipig gèn Amerikane aanneme wies det die vetkuif in ut Witte Hoès weg is.

Ut besteur volg de internasjonale óntwikkelinge euver migrasie op wereldniveau op de voot. Auk geit ut complete besteur met ein zekere regelmaat op bezeug nao lande wao spraake is van óngewinste óntwikkelinge. De Ald Boys blief zoeë doonde un klup van onbespraake gedraag.

- Van de vrouwelikke Ald Boys: d'r mótt nog ein stök binnekómme, det is d'r um 20.00 oor. Vraag aan Herman Douben: wie steit ut met de werkgroep Ald Boysinne? Herman antwoordt, det dae groep bezig is um ein Plan van Aanpak op te stelle. Titel: #metoo.

Ein bloomlaezing oèt de aanmeldinge veur vandaag en de reaksie van de veurzitter heej op en ein paar note van de notulant:

- Herman Douben wurd gefelicteerd met de aanschaf van zienen iPad en Harro Schroeder met zien iPhone
- Wiel Heijnen vruùg um oètleg van ut begrip 'nuuejing'. Loek is gaer bereid um det Wiel unne kièr röstig te gaon oètlegge.

- Toine Toten, as gebaore (of baeter gezag: te water gelaote) Zeeuw, meldt, det de môssele waal van Zeeuwse kómaaf mótte zien. 'Lange petattezak: maak die môssele klaor!'
- Pascal Marcelissen mak de klassieke fout um zich aan te melde via ziene werkmeel. Peter Jordan auk.... Veur beide leeje geldt: 'Ens, maar noeëts mièr hè?'
- Tim Nabben: kump gaer môssele aete, umdet hae anders nörges kump.... 'Dan môsse veurzitter waere, dan kumps-se nog ens örges!'
- Coen Vestjens leet ôs as aafgestudeerd seksuoloog oèt, waat unne coïtus interruptus is. Dao zien we moeëj klaor mei...
- Auk Gé van Telfort meldt zich aan 'vanaf mijn iPad'. Hiep Hiep Hoera veur Gé!
- Mario Seuren en Jos Zanders zörge veur unne primeur, door zich in eine meel aan te melde! Volges Loek hebbe we d'r ein niej setje beej! En dan is ut vandaag nog neet ens Roze Zaoterdaag!
- Twan Deckers is bang 'det dae van de gemeente de greunte veur de môssele van ut stadskantoeër plök'...
- Wiep van de Ven meldt zich op cryptische wièze aan. D'r is gen touw aan vas te knuipe. De veurzitter wins degenen die vanaovend naeve Wiep zitte dan auk hièl vuuël sterkte.
- Ten slotte: Sjaak van Elswièk. Dae meldt zich ièrs aan en vervolges weer aaf; waal met ein gooije raeje. Ziene kleinzoon Baer wuurd 8 jaor en hae hilt zaoterdaag 15 december 's middaags zien groeëteminsefees. En (ik citeer) 'in de waereld van Baer is Opa Sjaak de kleinste groeëte mins'. Baer wuurt binnen de femilie auk waal Einstein geneump.

Sjaak haet auk nog ein kritische noot richting de veurzitter. Ik citeer opniej: 'Asse 't aanvangstiedstip stels op vanaaf 17.15 oor, dan kin neemus te laat kômme, hóllewölle, al kumpse um 22.00 oor of nog later'. Baer haet ut intellect van zien opa meigekrege, duùdelik toch?

Onder dankzegging veur idders aanwezigheid en inbring (neemus dors de ganse vergadering waat te zegge), sluit de eminente veurzitter Loek um 18.11 oor dees Jaorvergadering. Arno en Toine gaon vervolgens veur idderein aan de slaag in de keuke (dao waare ze al lang mei bezig huùr) en Will serveert nog un paar glaze beer.

Letste noot van de notulant:

det ein vereinigung ein Jaorvergadering helt, det snap ik. Desse dich i.v.m. ut aete môs aanmelde, det snap ik auk nog. Maar desse 'beej de aanmelding môs zegge waorum desse wils komme'.... Det snap ik dan ech neet. Of haop dae veurzitter det 34 leeje dan type: 'umdet ik zoeë gaer d'n toespraak van de veurzitter wil huùre!' Nae toch?

Nagekômme punt: op de volgende Jaorvergadering zal ut ónderwerp Normen en Waarden beej de Ald Boys aan de agenda toegevoeg waere. Dit nao aanleiding van inkele oètspattinge later op d'n aovend.

Veur verslaag,

Paul Derkx, sikkertaris